



A V R O Y.

I R E,

SN'estimant pas auoir
suffisamment remply
mon deuoir par les assurances de
la continuation de mon seruice,
portees par ma precedente lettre à
vostre Majesté, ie fis incontinent
apres les mesmes protestations par
escrit au Parlement, & aux com-
munautéz de ceste Prouince, d'où
ie me promettois du bien pour elle
& pour moy. Pour la Prouince,
d'autant que cela me sembloit pro-
pre pour la tirer de l'alarme où ie la

voyois, & pour y retenir par mon exemple chacun en son deuoir: pour moy, parce que la submission estant tousiours prise en bonne part des Roys, principalement quand elle est publique, i'auois sujet de croire que la mienne me succederoit bien. Contre vne esperance si bien fondee on à icy refusé, SIRE, de voir mes lettres, & ce qui est mon sensible mal-heur, les rayons de vostre lumiere, vos commandemens depuis ce téps là, nem'ont point esclairé. Par degrez encores on n'a cessé de chercher les moyens d'amener les affaires de la Prouince à vne extreme aigreur, commandât aux Lieutenans d'armer, & à la Noblesse de les assister, & me desarmât iusques à ce point, de deffendre aux gens d'armes de la compagnie d'ordonnance, dont vostre Majesté m'a honoré, de se trouuer aupres de

moy sur peine de crime de leze Majesté, & aux habitans des villes & Capitaines des places du patrimoine de Madame la Duchesse de Mercœur, de m'y donner entree. Encores que tels arrests tiennent du naturel de la plume qui va bien viste, & des personnes qui les ont donnez, qui concluent aisement au sang, par ce qu'il n'y va iamais du leur; l'ayme neantmoins mieux les imputer aux partisans, que mes ennemis particuliers ont dans le Parlement, qu'à toute la compagnie. Selon la rigueur de ces gens là, ie me voy despouillé de ma charge, & de ma compagnie d'ordonnance. Mes vassaux & mes propres domestiques, qui presques tous sont Gentils-hommes de la Prouince, portez à rebellion contre moy. Encores cela ne leur a seruy que de degrez pour passer outre. J'ay appris,

SIRE, qu'ils ont faict entendre à vostre Majesté, que i'estois armé, & que ie prenois part à la fortification de Blauet, afin d'attirer contre moy vos armes en ceste Prouince. Soubs ces deux pretextes d'où i'ay principalement tiré sujet de venir de nouveau aux esclairecissements. Pour mes armes, ie ne sçay s'ils les fondent sur ma fuite ou sur mes actions: si c'est sur ma fuite, i'aduouë que i'ay esté acompagné iusqu'à present d'assez bon nombre de Noblesse, mais ce n'est pas chose nouuelle. Aux autres voyages que i'ay faits en Bretagne, ie ne l'estois pas moins, & puis cet ordre s'approche aussi naturellement de ceux de ma naissance que le fer de l'aimant. Ayant depuis deux mois tant souffert en ma liberté, en ma charge, & en ma reputation, choses si précieuses, & estât le propre des iniures

d'aller tousiours en croissant (ie ne pense pas , SIRE,) qu'on deust trouuer estrange si pour ma seureté i'estois maintenant plus accompagné que ie ne fus iamais. En cela neantmoins il n'y a rien d'augmenté. Si sur mes actions, il seroit à desirer que celles de Rennes & des autres villes du pays fussent aussi paisibles que les miennes, la province s'en porteroit bien mieux. Qui voudroit maintenant trouuer la paix en Bretagne, il la faudroit chercher où ie suis. Qui voudroit trouuer l'image de la guerre, il la faudroit chercher par tout ailleurs. Si mes ennemis auoient enuoyé informer sur mes voyes, ils seroient contraincts de parler & decrire de moy autrement qu'ils ne font; pour Blauer, le droict m'estant demeuré de dire mon aduis de ce qui se passe en mon gouuernement. Il est

raisonnable de iuger de cesté fortification, par sa cause, par la fin, & par les offres de ceux qui s'y employent: par sa cause, le sieur de Fouquerolles a commandé de la part de vostre Majesté aux Capitaines particuliers des places de Bretagne, de s'asseurer chacun d'eux de celles qui leur estoient donnees en garde. Soubs vn si legitime commandement le Capitaine de Blauet a fondé ce qu'il faict: par la fin, en vne saison où il voyoit la paix se troubler aucunement, il a creu deuoir preuenir d'autres personnes qui attendoient: il y a long temps vne occasion propre pour se preualoir au dommage du pays de l'aduantage de cet emplacement: par les offres, le grand Preuost de Bretagne estant descendu sur le lieu le Capitaine a offert d'en sortir, & de ruiner ses fortifications aussi tost
que

2087.17 lib II 9

SECONDE
LETTRE
DE
MONSIEVR
DE VENDOSME,
Au Roy.



A PARIS,
Chez PIERRE CHEVALIER, ruë S.
Iacques, à l'Image saint Pierre,
pres les Mathurins.

M. D C. X I V.
Avec Permission.

1800
1801
1802

1803
1804
1805

1806
1807
1808

1809
1810
1811

1812
1813
1814

que vostre Majesté le luy commanderait, ne croyant pas deuoir aucunement desemparer & deffaïre ce qu'il dit n'auoir faict, par son commandement. Si tous ces respects l'ont poussé à ce qu'il a faict, on a raison de dire que ie prends part à sa preuoyance. S'il vuide, s'il demolist, au premier commandement, ie prendray encores plus volontiers part à la gloire de son obeissance. Ie pense, SIRE, m'estre suffisamment iustificié des deux pretextes que mes ennemis prennent pour armer vostre Majesté contre moy : Mais ce n'est assez, il faut que ie luy face voir les causes qui les poussent, rien ne luy importe d'auantage que de cognoistre bien son Royaume en general, & ses prouinces en particulier. En celles cy, SIRE, il y a vne faction enracinée qui l'a mise en l'estat où

elle est vn ver qui fera mourir
 l'arbre si vostre Majesté l'y laisse
 plus longuement. Son chef impa-
 tient de tous temps de souffrir les
 superieurs, ayant trouué de sem-
 blables membres, qui ne sçait les
 trainees, les obliques voyes, que
 luy & eux ont tenus depuis quatre
 ans pour vsurper ma charge? C'est
 en ceste source où on puise les ad-
 uis qu'on donne que ie suis armé.
 A quel'e fin? Pour faire enuoyer
 icy le chef avec armee, & se seruir
 des forces & du nom de vostre Ma-
 jesté, pour y exercer tous les maux
 que les factions ne manquent ia-
 mais à faire quand elles en ont la
 puissance. Si ie n'auois esgard qu'en
 mon particulier, ie ne me mettrois
 pas en deuoir de destourner ce des-
 sein; Dieu m'a faict sortir de trop
 bon lieu pour entrer iamais en ap-
 prehension de mes ennemis parti-

culiers en quelque estat qu'ils soiēt.
 Mais, SIRE, ie ne puis souffrir
 sans me plaindre, que par artifices
 & impostures, on mette dauanta-
 ge vostre Majesté en cholere contre
 moy, mon innocence, & contre la
 cōtinuatiō de mon obeissance. Sur
 ceste seconde protestation de serui-
 ce, ie la supplie tres-humblement
 de me remettre icy en l'exercice de
 la charge que ie tiens du feu Roy
 son Pere, de n'en honorer point,
 en attendant cest effect de iustice,
 ceux qui ont autresfois porté les ar-
 mes contre luy & qui sont mainte-
 nant mes ennemis irreconciliables,
 & d'empescher qu'ils ne troublent
 par armes ouuertes le repos de ceste
 sienne prouince. En guerre estran-
 gere, les Roys peuuent trouuer &
 honneur & profit: En la domesti-
 que, quelque chose qui arriue, tou-
 te la perte retombe dessus eux. Si

les armes de vostre Maieité n'ont
 autre object que moy pour se faire
 seruir, elle n'a qu'à m'honorer de ses
 commandemens, ma parfaicte
 obeissance luy rendra preuue que
 ie n'ay rien tant ferme dans le cœur,
 que l'inuiolable qualité,

SIRE,

*De vostre tres-humble, tres-
 obeissant & tres-fidele
 subject & seruiteur,*

CESAR DE VENDOSME.

De Lamballes ce 27. Mars, 1614.